

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD SREBRENİK

PRIJEDLOG

ODLUKA

O PRIVREMENOM KORIŠTENJU JAVNIH POVRŠINA U GRADU SREBRENİKU

OBRAĐIVAČ: Služba za prostorno uređenje i zaštitu okolice

PREDLAGAČ: Gradonačelnik

RAZMATRA I USVAJA: Gradsko vijeće

Srebrenik, mart 2026 godine

Na osnovu člana 13. Zakona o principima lokalne samouprave („Službene novine Federacije BiH“, broj: 49/06 i 51/09), člana 25. stav (1) tačka 27. i člana 123. Statuta grada Srebrenik („Službeni glasnik grada Srebrenika“, broj: 01/24), Gradsko vijeće grada Srebrenika, na sjednici održanoj dana _____ 2026. godine, **d o n i j e l o j e**:

O D L U K U

o privremenom korištenju javnih površina u gradu Srebreniku

I - OPŠTE ODREDBE

Član 1.

- (1) Odlukom o privremenom korištenju javnih površina u gradu Srebreniku (u daljem tekstu: Odluka) definišu se: javne površine u gradu Srebreniku (u daljem tekstu: grad), način i uslovi za sticanje prava korištenja, postupak izdavanja odobrenja, visina i način plaćanja naknada, prestanak važenja rješenja, nadzor nad sprovođenjem Odluke i kaznene odredbe.
- (2) Pod privremenim korištenjem javne površine podrazumijeva se zauzimanje javne površine na određeno vrijeme na način koji ne mijenja njen karakter.

Član 2.

- (1) Javnim površinama u smislu ove Odluke smatraju se:
 - a) javne saobraćajne površine: pješačke zone, ulice, ceste, trgovi, javni prilazi, javna stepeništa, mostovi, skverovi, javna parkirališta, pločnici, pothodnici, kao i ostale površine javnog saobraćaja u mirovanju;
 - b) željeznički peroni, stajališta javnog autobusnog saobraćaja;
 - c) javne zelene površine: parkovi, park-šume, dječija igrališta, travnjaci, staze, zemljišni pojas uz javne saobraćajne površine na kojem je zasađeno zelenilo, zelene površine uz objekte javne namjene, površine uz vodotoke – obale rijeka, te odmorišta, trotoari i staze koje su sastavni dio zelenih površina, posude za cvijeće i slične površine
 - d) javne rekreacione površine, sportska igrališta i ostali javni sportski objekti i uređaji na njima, kao i prostori povezani s tim terenima;
 - e) ostale površine uz objekte namijenjene za javne priredbe, otvoreni pijačni i tržni prostor i prostori oko prodajnih objekata, neizgrađena gradska građevinska zemljišta i neuređene javne površine prostora.

Član 3.

- (1) Javne površine mogu se koristiti privremeno za:
 - a) zauzimanje površina koje nisu sastavni dio postojećeg poslovnog objekta;
 - b) postavljanje ljetnih bašta, privremenih prodajnih i izložbenih mjesta uz vlastiti objekat;
 - c) postavljanje montažno-demontažnih objekata tipa „kiosk“;
 - d) prodaju pokretnih aparata i artikala (kokice, sladoled, knjige, cvijeće, štampa, tradicionalna jela, kozmetika, ukrasni predmeti);
 - e) postavljanje reklama, transparenata, panoa, natpisa, izloga;
 - f) postavljanje pojedinačnih reklama na fasadama ili površini ispred objekata;
 - g) održavanje kulturnih, zabavnih, sportskih, humanitarnih manifestacija;
 - h) deponovanje građevinskog materijala;
 - i) postavljanje građevinskih fasadnih skela.

Član 4.

- (1) Privremeno korištenje javne površine može početi tek nakon kumulativnog ispunjenja sljedećih uslova:
 - a) pribavljeno odobrenje nadležne gradske službe;
 - b) zaključen Ugovor, ako se površina dodjeljuje putem javne licitacije;
 - c) plaćen iznos naknade utvrđen od strane nadležne gradske službe.
- (2) Korisnik je obavezan imati kod sebe rješenje o odobrenju, Ugovor o zakupu i potvrdu o uplati, i iste pokazati na zahtjev nadzornog organa.

Član 5.

- (1) Korisnik javne površine može je koristiti samo u svrhe i na način određen ovom Odlukom, ugovorom o zakupu i odobrenjem za korištenje.

- (2) Pravo privremenog korištenja javne površine može se prenijeti na drugo lice (npr. u slučaju prodaje objekta ili nasljeđivanja) uz prethodnu saglasnost zakupodavca.
- (3) Novi korisnik koristi površinu pod istim uslovima i do roka na koji je ista bila ustupljena prethodniku, nakon čega se zaključuje novi ugovor.

Član 6.

- (1) Privremeno korištenje javnih površina odobrava se na period do 1 (jedne) godine, osim u slučajevima predviđenim ovom Odlukom za specifične objekte.
- (2) Privremeno korištenje javnih površina za ljetne bašte može se odobriti od marta do oktobra tekuće godine.
- (3) Izuzetno, objekti tipa „KIOSK“ koji su dodijeljeni putem javne licitacije mogu se produžiti na period do 5 godina, ukoliko Grad ne planira upotrebu površine za drugu namjenu i nema novih zainteresovanih lica.
- (4) Privremeno korištenje javnih površina za prodaju cvijeća, suvenira i sličnog može se odobriti na period do 15 dana i površinu do 5 m², uz obračun posebne naknade.
- (5) Privremeno korištenje javnih površina za manifestacije ili promocije proizvoda kraće od 24 sata ne zahtijeva odobrenje, uz obavezu vraćanja površine u prvobitno stanje u roku od 24 sata.
- (6) Lica koja su registrovana u Registru novčanih kazni ne mogu koristiti javnu površinu; provjera se vrši službenim putem iz nadležne službe.
- (7) Lica koja su sankcionisana zbog kršenja odredaba ove Odluke u prethodnoj godini ne mogu dobiti novo odobrenje bez prethodne provjere.

Član 7.

- (1) Privremeno korištenje javnih površina odobrava se na jedan od sljedećih načina:
 - a) **Pojedinačni zahtjev** – u slučajevima iz člana 3. stav (1) tač. b), d), f), g), h) i i), odobrenje se izdaje na osnovu mišljenja Komisije imenovane od strane Gradonačelnika.
 - b) **Javno nadmetanje – licitacija** – u slučajevima iz člana 3. stav (1) tač. a) i c), licitaciju provodi Komisija imenovana od Gradonačelnika, uz administrativno-tehničku podršku Službe za prostorno uređenje i zaštitu okolice.
 - c) **Javno nadmetanje po Planu pogodnih lokacija** – u slučajevima iz člana 3. stav (1) tač. e) ili drugih potreba za privremenim korištenjem javne površine. Plan pogodnih lokacija izrađuje Komisija iz stave 1. tač. b).

Član 8.

- (1) Za korištenje javnih površina u pješačkoj zoni u ulici Alije Izetbegovića, odobrenje se izdaje prema Planu korištenja javnih površina u toj ulici, koji je sastavni dio ove Odluke (Aneks Odluke).
- (2) Odobrenje za kioske izdaje se nakon provedene javne licitacije na period od 1 (jedne) godine. Po isteku tog perioda, korištenje se može produžiti, bez ponovnog provođenja licitacije, na period do 5 godina, ukoliko Grad ne planira korištenje predmetne površine za drugu namjenu i nema drugih zainteresovanih lica.

Član 9.

- (1) Zahtjev za privremeno korištenje javne površine podnosi se nadležnoj gradskoj službi.
- (2) Zahtjev mora sadržavati:
 - a) ime i prezime, odnosno naziv pravnog lica;
 - b) adresu prebivališta ili sjedišta;
 - c) svrhu korištenja javne površine;
 - d) tačnu lokaciju i površinu koja se traži na korištenje;
 - e) period na koji se traži korištenje javne površine.
- (3) Uz zahtjev se prilaže potrebna dokumentacija kojom se dokazuje ispunjavanje uslova za korištenje javne površine.

II – POSTUPAK IZDAVANJA RJEŠENJA O ODOBRENJU KORIŠTENJA JAVNIH POVRŠINA

Član 10.

- (1) O privremenom korištenju javne površine odlučuje nadležna gradska služba rješenjem.
- (2) Rješenje iz stava (1) ovog člana naročito sadrži:
 - a) podatke o korisniku javne površine;
 - b) lokaciju i površinu koja se daje na korištenje;
 - c) namjenu korištenja javne površine;
 - d) period korištenja;

- e) visinu i način plaćanja naknade;
- f) obaveze korisnika u pogledu održavanja javne površine i vraćanja u prvobitno stanje.

Član 11.

- (1) Korisnik javne površine dužan je koristiti površinu u skladu sa odobrenjem, ovom Odlukom i drugim važećim propisima.
- (2) Korisnik je obavezan održavati javnu površinu urednom i čistom, te po isteku odobrenog perioda površinu vratiti u prvobitno stanje.
- (3) Zabranjeno je proširivanje zauzete javne površine izvan odobrenih granica.

Član 12.

- (1) Nadležna gradska služba može ukinuti odobrenje za korištenje javne površine prije isteka roka ukoliko korisnik:
 - a) koristi javnu površinu suprotno odobrenoj namjeni;
 - b) ne plaća propisanu naknadu;
 - c) ne održava javnu površinu urednom;
 - d) proširi korištenje izvan odobrene površine.
- (2) U slučaju ukidanja odobrenja, korisnik je dužan odmah ukloniti postavljene objekte i javnu površinu vratiti u prvobitno stanje.

III –URBANISTIČKO-TEHNIČKI USLOVI

Član 13.

- (1) Mjesta na javnim površinama na kojima je odobreno postavljanje ljetnih bašta moraju ispunjavati sljedeće uslove:
 - a) prostor koji ostaje za pješake ne može biti uži od dva metra, a udaljenost ograde ljetne bašte od ruba saobraćajnice ne može biti manja od dva metra,
 - b) javna parkirališta i površine na kojima se nalaze ventilacioni otvori i slično ne mogu se odobriti za postavljanje ljetne bašte, osim ukoliko nadležna Služba ne ocijeni drugačije,
 - c) u površinu ljetne bašte uračunava se i površina žardinjere ili druge ograde koja se postavlja uz rubove bašte,
 - d) visina pokretne ograde ne može biti veća od jednog metra,
 - e) ukoliko se prostor ljetne bašte nalazi djelimično ili u cjelosti na javnoj zelenoj površini, ista se mora zaštititi montažno-demontažnom podlogom,
 - f) postavljanje ljetne bašte ne može se odobriti za poslovni prostor koji nema direktan ulaz sa javne površine, odnosno trotoara,
 - g) po prestanku rada ugostiteljske radnje, kao i po isteku roka određenog u rješenju za korištenje javne površine, mora se ukloniti sve što je bilo u funkciji ljetne bašte, a površina se mora privesti prvobitnoj namjeni u roku od 7 dana,
 - h) uslove tipa i izgleda ljetne bašte propisuje nadležna Služba,
 - i) u slučaju oštećenja ploča na šetalištu ili druge javne površine prilikom postavljanja, korištenja ili uklanjanja ljetne bašte, korisnik je dužan oštećenja otkloniti i površinu dovesti u prvobitno stanje, odnosno nadoknaditi nastalu štetu o svom trošku.

Član 14.

- (1) Mjesta na javnim površinama na kojima je odobreno postavljanje objekata tipa kiosk moraju ispunjavati sljedeće uslove:
 - a) postavljanjem ovih objekata ne može se spriječiti ili otežati korištenje zgrada ili drugih objekata niti ugroziti bezbjednost saobraćaja i pješaka,
 - b) postavljanje objekata u blizini raskrsnice mora biti u skladu sa bezbjednošću saobraćaja i ne smije smanjivati preglednost (zaklanjati signalizaciju, otežavati kretanje pješaka i sl.),
 - c) objekti mogu biti tipski, montažno-demontažni, lake konstrukcije,
 - d) objekti se mogu postavljati samo na mjestima na kojima neće dolaziti do onečišćenja javne površine i ometanja saobraćaja, niti narušavanja estetskog izgleda prostora,
 - e) gabariti objekta zavise od namjene i lokacije, a po pravilu ukupan korisni prostor ne može biti veći od 12 m².

Član 15.

- (1) Reklamni uređaji su naprave za prikazivanje izmjenjivih reklamnih poruka.

- (2) Reklamne poruke mogu se izmjenjivati mehanički (trivision, scrolleri i sl.) ili elektronskim prikazom slike (display i sl.).
- (3) Reklamni uređaji koji se planiraju postaviti na javnim površinama mogu biti površine do 30 m².
- (4) Reklamni uređaji postavljaju se kao samostojeći uređaji na jednom ili dva oslonca (stuba).
- (5) Reklamni uređaj može biti ukupne visine (stub + display) do 6 m od kote terena.
- (6) Reklamni uređaji ne mogu se postavljati u zoni raskrsnice, odnosno:
 - a) uređaji veličine do 12 m² na udaljenosti manjoj od 30 m,
 - b) uređaji veličine do 30 m² na udaljenosti manjoj od 50 m, mjereno od početka radijusa za desno skretanje, niti u trouglu preglednosti ceste.
- (7) Reklamni uređaji veličine do 12 m² mogu se postavljati na udaljenosti minimalno 2 m od vanjske ivice trotoara do bliže strane uređaja, te minimalno 4 m od ivice kolovoza.
- (8) Reklamni uređaji veličine do 30 m² mogu se postavljati na udaljenosti minimalno 3 m od vanjske ivice trotoara do bliže strane uređaja, te minimalno 6 m od ivice kolovoza.
- (9) Ukoliko se reklamni uređaj postavlja na zelenoj površini ili u parku, temelj nosivih stubova mora imati nadstoj zemlje od najmanje 20 cm i ne smije ugrožavati stabla, parkovsko rastinje niti funkcionisanje okolnih objekata.

Član 16.

- (1) Za postavljanje ljetnih bašta, privremenih prodajnih i izložbenih mjesta na javnim površinama ispred vlastitih poslovnih objekata u pješačkoj ulici Alije Izetbegovića može se izdati odobrenje samo za postavljanje stolova, stolica, pokretnih suncobrana na jedan oslonac i sklopivih konzolnih tendi, koje moraju biti jednoobraznog izgleda i fiksirane isključivo na objekat, uz prethodno pribavljene ateste i saglasnosti etažnih vlasnika.
- (2) U ostalim zonama grada može se odobriti, na godišnjem nivou, postavljanje objekata montažno-demontažnog karaktera na javnoj površini uz ugostiteljski objekat, uz dostavljanje saglasnosti vlasnika zemljišta i odobrenja nadležne službe za urbanizam.

Član 17.

- (1) Za postavljanje transparentata, reklamnih panoa, manjih plakata „JUMBO“ plakata i sl., Grad Srebrenik putem nadležne službe svake kalendarske godine raspisuje oglas za dodjelu lokacija putem javnog nadmetanja – licitacije, na osnovu plana pogodnih lokacija.
- (2) Početna licitaciona cijena po 1 m² reklamnog panoa iznosi 10 KM mjesečno, s tim da ne može biti manja od 20 KM mjesečno kada je površina manja od 1 m².
- (3) Izuzetno, postavljanje pokretnih reklamnih panoa ispred vlastitih poslovnih prostora može se odobriti na osnovu pojedinačnog zahtjeva, pod uslovom da su samostojeći i da ne ugrožavaju pješake, objekte ili saobraćaj. Visina ovih panoa ne može biti veća od 1,2 m, a širina 0,6 m.
- (4) Naknada za postavljanje iznosi 40 KM mjesečno po reklami, odnosno 200 KM za period od jedne godine.
- (5) Odobrenje se može produžiti na period od jedne godine ako Grad ne planira korištenje predmetne površine za drugu namjenu i ako nema drugih zainteresovanih korisnika.

Član 18.

- (1) Postavljanje svijetlećih reklama, transparentata i reklamnih panoa može se vršiti i na fasadama objekata i zemljištu u vlasništvu pravnih ili fizičkih lica, uz odobrenje nadležne službe i saglasnost vlasnika nekretnine.
- (2) Naknada iznosi:
 - a) I i II zona – 10 KM/m² (minimum 20 KM mjesečno)
 - b) III–VI zona – 3 KM/m² (minimum 14 KM mjesečno)
 - c) ostale zone – 4 KM/m² (minimum 10 KM mjesečno)
- (3) Ako se reklama postavlja na objektu koji je spomenik kulture, potrebno je pribaviti mišljenje nadležnog organa za zaštitu spomenika kulture.

Član 19.

- (1) Odobrenje za korištenje javne površine za postavljanje zabavnih parkova, cirkuskih šatri i drugih zabavnih sadržaja izdaje nadležna gradska služba.
- (2) Prije izdavanja odobrenja iz stava (1) ovog člana, nadležna gradska služba može pribaviti mišljenje ili saglasnost drugih nadležnih organa i institucija, ukoliko je to potrebno radi sigurnosti učesnika, odvijanja saobraćaja, zaštite javnog reda i mira ili zaštite okoliša i sl.
- (3) Organizator je odgovoran za redovno održavanje i sigurnost prostora tokom trajanja postavljanja zabavnog sadržaja, uključujući sigurnost posjetilaca i prolaznika.

(4) Organizator je dužan nadoknaditi svu eventualnu štetu nastalu tokom postavljanja, korištenja i uklanjanja zabavnog sadržaja, uključujući štetu na podlogama, pločama, zelenim površinama i dr.

(5) Način, uslovi i postupak korištenja javnih površina za namjene iz stava (1) ovog člana uredit će se posebnom odlukom Gradskog vijeća.

IV – NAKNADE

1. JAVNE POVRŠINE U PJEŠAČKOJ ZONI

Član 20.

- (1) Za privremeno korištenje javne površine korisnik je dužan plaćati naknadu koja se uplaćuje u korist budžeta Grad Srebrenika.

Član 21.

(1) Za postavljanje ljetnih bašta, privremenih prodajnih i izložbenih mjesta uz izgrađene vlastite poslovne objekte i prostorije plaća se mjesečna naknada u iznosu od 12 KM/m², a početna licitaciona cijena za organizovanje i postavljanje sadržaja na mjestima koji nisu sastavni dijelovi postojećih poslovnih objekata i prostorija iznosi 30 KM/m²;

(2) Za postavljanje privremenih objekata montažno-demontažnog karaktera tipa „KIOSK“, na predviđenim mjestima početna cijena za javno nadmetanje je 40 KM/m²;

(3) Za postavljanje pokretnih aparata za kokice i sladoled, stolova za prodaju knjiga, cvijeća, štampe, prehrambenih proizvoda, kozmetike, ukrasnih predmeta i dr., plaća se naknada od 100KM mjesečno po jednom pokretnom predmetu;

(4) Za privremeno korištenje javnih površina u svrhu prodaje cvijeća, ukrasnih predmeta, kozmetike, čestitki, suvenira i slično, u dane državnih i drugih praznika, plaća se naknada u iznosu od 20KM/m² dnevno, s tim da ista ne može biti manja od 20 KM po prodajnom štandu.

(5) Za privremeno korištenje javnih površina u svrhu postavljanja transparentata, reklamnih panoa, natpisa, izloga, reklamnih ormarića i plakata početna licitaciona cijena po 1m² zauzete javne površine iznosi 20,00 KM mjesečno, s tim da ova cijena ne može biti manja od 20,00 KM mjesečno ukoliko se zauzima manje od 1m² javne površine.

(6) U slučaju da grad Srebrenik vrši postavljanje panoa, odnosno bilborda koji nisu komercijalnog karaktera i služe u svrhu promocije Grada, isti se mogu postaviti bez naknade i na osnovu Plana pogodnih lokacija urađenog od strane Komisije imenovane rješenjem Gradonačelnika.

2. JAVNE POVRŠINE U OSTALIM ZONAMA

Član 22.

(1) Za postavljanje ljetnih bašta, privremenih prodajnih i izložbenih mjesta uz izgrađeni vlastiti poslovni objekat i prostor plaća se mjesečna naknada u iznosu od 10 KM/m², a početna licitaciona cijena za postavljanje ljetnih bašta koje nisu sastavni dijelovi postojećih poslovnih objekata i prostorija iznosi 10 KM/m²;

(2) Za postavljanje privremenih objekata montažno-demontažnog karaktera tipa „KIOSK“, na predviđenim mjestima početna cijena za javno nadmetanje je 25 KM/m²;

(3) Za postavljanje pokretnih aparata za kokice i sladoled, stolova za prodaju knjiga, cvijeća, štampe, prehrambenih proizvoda, kozmetike, ukrasnih predmeta i dr., plaća se naknada od 50KM mjesečno po jednom pokretnom predmetu;

(4) Za privremeno korištenje javnih površina u svrhu prodaje cvijeća, ukrasnih predmeta, kozmetike, čestitki, suvenira i slično, u dane državnih i drugih praznika, plaća se naknada u iznosu od 10 KM/m² dnevno.

Član 23.

(1) Izuzetno, naknade za korištenje javne površine u svrhu postavljanja pokretnih aparata za kokice i sladoled, stolova za prodaju knjiga, cvijeća, štampe, tradicionalna jela, kozmetike, ukrasnih predmeta i dr., oslobođeni su pripadnici organizacije ratnih vojnih invalida, članovi porodica šehida i poginulih boraca, demobilisani borci, penzioneri i registrovana udruženja i javne ustanove sa područja Grada Srebrenika, uz prethodno pribavljeno mišljenje nadležne gradske službe za poslove društvenih djelatnosti i boračko-invalidske zaštite.

- (2) Način i kriteriji oslobađanja, uključujući postupak dokazivanja prava, utvrđuju se rješenjem nadležne službe.

V –PRESTANAK VAŽENJA RJEŠENJA

Član 24.

- (1) Korisnici javnih površina su dužni u svemu pridržavati se uslova propisanih odredbama ove Odluke i rješenjem o odobrenju privremenog korištenja javne površine.

Član 25.

(1) Rješenje o odobrenju privremenog korištenja javne površine prestaje važiti i prije isteka vremena na koje je izdato u sljedećim slučajevima:

- a) ako korisnik ne koristi javnu površinu na način i u svrhu kako je određeno ovom Odlukom ili rješenjem o odobrenju,
- b) ako javnu površinu koristi lice koje u rješenju nije navedeno kao korisnik,
- c) ako korisnik u toku perioda na koji mu je odobreno korištenje javne površine bude dva ili više puta kažnjen zbog nepridržavanja odredaba ove Odluke ili drugih važećih propisa.

Član 26.

- (1) Postojanje razloga iz člana 25. ove Odluke utvrđuje rješenjem komunalni inspektor, koje dostavlja korisniku javne površine i nadležnoj gradskoj službi.
- (2) Žalba protiv ovog rješenja ne odlaže njegovo izvršenje.

VI – NADZOR I UPRAVNE MJERE

Član 27.

- (1) Nadzor nad provođenjem ove Odluke vrši komunalna i urbanističko-građevinska inspekcija Grada Srebrenik.

Član 28.

- (1) Prilikom obavljanja nadzora, organ nadzora ima pravo i dužnost da od osoba koje zatekne u korištenju javnih površina zatraži na uvid:
 - a) odobrenje za korištenje javne površine,
 - b) ugovor o zakupu,
 - c) potvrdu o uplati zakupnine.
- (2) Ako lice odbije pokazati tražene isprave ili ih nije u mogućnosti pokazati, organ nadzora donosi rješenje o zabrani korištenja javne površine, u skladu sa odredbama ove Odluke.

Član 29.

(1) Korisnici javnih površina su dužni u svemu se pridržavati uvjeta određenih u odobrenju o zauzimanju javne površine.

(2) Za objekte, naprave, i druge pokretne stvari koji se nalaze na javnim površinama bez odobrenja nadležne službe, ili protivno odobrenju, kao i s odobrenjem čiji je rok istekao, kao i za objekte korisnika koji se ne pridržava uslova određenih u odobrenju za zauzimanje javne površine, nadležni komunalni inspektor će naložiti JP "9. Septembar" d.d. Srebrenikda izvrši uklanjanje istih o trošku korisnika u roku od 24 sata. Žalba izjavljena na rješenje o uklanjanju ne odlaže izvršenje rješenja.

(3) Objekti uklonjeni u postupku prinudnog izvršenja će se deponovati u krugu JP "9. Septembar" d.d. Srebrenik.

(4) Nadležni inspektor i ovlašteni predstavnik JP "9. Septembar" d.d. Srebrenik, dužni su sačiniti zapisnik o izvršenoj primopredaji, zajedno sa foto-dokumentacijom objekata koji se deponuju.

(5) JP "9. Septembar" d.d. Srebrenik će za deponovanje i čuvanje uklonjenih objekata vlasniku fakturirati na mjesečnom nivou troškove čuvanja i deponovanja. Fakturisanje će se vršiti sve do preuzimanja deponovanih objekata od strane vlasnika ili do propasti stvari.

(6) JP "9. Septembar" d.d. Srebrenik je odgovoran za pravilno skladištenje i čuvanje deponovanih objekata, te je dužan s istim postupati s pažnjom dobrog domaćina.

(7) U slučaju zauzimanja javne površine veće od odobrene, korisnik je dužan za višak zauzete površine isplatiti dvostruku naknadu za čitavo vrijeme trajanja odobrenja te višak zauzete površine vratiti u prvobitno stanje u roku od 3 dana. U suprotnom će se pokretni objekt ukloniti o trošku korisnika.

VII – KAZNENE ODREDBE

Član 30.

- (1) Novčanom kaznom od 1.000 KM do 3.000 KM kaznit će se za prekršaj pravno lice:
 - a) ako javnu površinu izdaje u podzakup drugom licu,
 - b) ako javnu površinu koristi suprotno odredbama ove Odluke,
 - c) ako nakon prestanka korištenja ne ukloni tragove korištenja javne površine,

- d) ako započne korištenje javne površine prije pribavljanja odobrenja, zaključenja ugovora i uplate zakupnine.
- (2) Za prekršaje iz ovog člana kaznit će se i odgovorno lice u pravnom licu novčanom kaznom od 250 KM do 500 KM.

Član 31.

- (1) Za prekršaje iz člana 30. ove Odluke kaznit će se fizičko lice kao i registrovano fizičko lice koje samostalno obavlja određenu djelatnost, novčanom kaznom od 500 KM do 1.500 KM.

Član 32.

- (1) Novčanom kaznom od 500 KM do 1.500 KM kaznit će se za prekršaj pravno lice:
 - a) ako javnu površinu i objekte na njoj ne održava urednim i čistim,
 - b) ako na zahtjev organa nadzora ne pokaže odobrenje za korištenje, ugovor o zakupu ili dokaz o uplati zakupnine.
- (2) Za prekršaj iz ovog člana kaznit će se i odgovorno lice u pravnom licu novčanom kaznom od 250 KM do 500 KM.

Član 33.

- (1) Za prekršaje iz člana 32. ove Odluke kaznit će se fizičko lice novčanom kaznom od 250 KM do 500 KM.

Član 34.

- (1) Gradonačelnik može, prema ukazanoj potrebi, donijeti instrukciju kojom će bliže odrediti posebne uslove za privremeno korištenje javnih površina, ukoliko to nije u suprotnosti sa ovom Odlukom.

Član 35.

- (1) Javna površina može se privremeno koristiti za postavljanje građevinskih fasadnih skela i deponovanje građevinskog materijala u skladu sa Odlukom o komunalnom redu Grada Srebrenik.
- (2) Za privremeno korištenje javne površine iz prethodnog stava plaća se naknada u iznosu od 100 KM mjesečno.

Član 36.

- (1) Stupanjem na snagu ove Odluke prestaje da važi Odluka o privremenom korištenju javnih površina („Službeni glasnik općine Srebrenik“, broj: 4/09, 2/12, 2/14 i 3/16).
- (2) Rješenja o privremenom korištenju javnih površina izdata prije stupanja na snagu ove Odluke ostaju na snazi do isteka roka utvrđenog u rješenju.

Član 37.

(Stupanje na snagu)

Ova Odluka stupa na snagu osmog dana od dana objavljivanja u “Službenom glasniku Grada Srebrenik”.

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
GRAD SREBRENİK
Gradsko vijeće
Broj: 01- /26
Srebrenik, _____ 2026. godine

PREDSJEDAVAJUĆI
GRADSKOG VIJEĆA
Nisvet Sejdinović

O b r a z l o ž e n j e

I. Pravni osnov

Pravni osnov za donošenje Odluke o privremenom korištenju javnih površina sadržan je u članu 13. Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), te u članu 25. stav (1) tačka 27. i članu 123. Statuta Grada Srebrenik („Službeni glasnik grada Srebrenik“, broj: 1/24).

Zakonom i Statutom je propisano da Gradsko vijeće, između ostalog, donosi odluke koje uređuju privremeno korištenje javnih površina, visinu naknada, uvjete korištenja i nadzor nad sprovođenjem tih odluka.

II. Razlozi za donošenje Odluke

S obzirom na potrebu uređenja korištenja javnih površina u gradu Srebreniku i omogućavanja privremenog korištenja istih u skladu sa usvojenim planovima, smatramo neophodnim definisati:

1. vrste javnih površina koje se mogu privremeno koristiti,
2. postupak izdavanja odobrenja za privremeno korištenje,
3. uslove i način plaćanja naknada,
4. prestanak važenja rješenja i sankcije u slučaju nepoštivanja odredaba,
5. nadzor nad sprovođenjem Odluke.

Cilj ove Odluke je omogućiti ravnomjerno, pregledno i transparentno korištenje javnih površina, zaštitu interesa Grada i građana, te osigurati sigurno i uredno korištenje prostora za sve korisnike.

III. Ciljevi i očekivani efekti

- Uređenje privremenog korištenja javnih površina u skladu sa propisima i prostornim planom,
- Povećanje efikasnosti i transparentnosti u izdavanju odobrenja,
- Osiguranje redovnog nadzora i održavanja javnih površina,
- Stvaranje jasnih kriterija za naplatu naknada, uključujući povlastice za određene kategorije korisnika,
- Sprječavanje nelegalnog korištenja javnih površina i kršenja propisa.

Odluka je u skladu sa principima lokalne samouprave, te predstavlja osnov za transparentno i pravedno privremeno korištenje javnih površina u Gradu Srebreniku.

Obrađivač

Služba za prostorno uređenje i zaštitu okolice